

Daihgya Guhdoih Hengz Saeh Moq

□Yiz Ciz/余执

Cin daengz bak va hai,
Raeuz dap daiz ciengq go,
Doengzdoih hengz saeh moq,
Angqfofo gvaq ngoenz.

Guhlaeuj laeg nyag lai,
Vaih ngaenz youh vaih haeux,
Mbouj ngah hengz saeh gaeuq,
Doxnaeuz gwn laeuj van.

Doengzdoih byaij roen moq,
Doxnaeuz hengz saeh ndei,
Guhlaeuj mbouj doxbeij,
Mbouj meiz(miz) bouxlawz lwnh.

Guhlaeuj dwg saeh 'angq,
Gaej gangj aeu cienzcaiz,

Song ranz cungj simhai,
Daihlaeng cij vuenyungz.

Ngoenz angq cij guhlaeuj,
Doxnaeuz gaej guh yak,
Fung ngaenz bak song bak,
Raeuz gag rox cix baenz.

Guhdoih hengz saeh moq,
Goq aen gya raeuz ndei,
Begaeh mbouj doxbeij,
Dauzheiq lai fouzyungh.

Boux dai mbouj ndaej dauq,
Lauq ngaenzcienz guh maz,
Mwh leix ngoenzngoenz ra,
Cij miz naj doiq vunz.

Ciuhvunz mbouj suenq raez,
Doxgyaez cij dwg bauj,
Miz gwn gingq bouxlaux,
Simhauq bouxboux haenh.

Dangjyenz daeuj daiqdaeuz,
Doxnaeuz vih beksingq,
Danhfanz ndang raeuz cingq,
Yienghyiengh cingh lumj raemx.

Ganbu daeuj daiqdaeuz,
Saeh gaeuq mbouj caiq hengz,
Daihgya guh ndaej deng,
Gwndaenj engq ndei lai.

Seizneix Gwndaenj Ndei

□ Maz Yinghvanz/麻英环

Seizgonq daenj buhvaq,
Sik gvaq liux caiq fong;
Baez yaek bae guhhong,
Vuenh buhfong bae doengh.

Seizneix buhvaq ndei,
Gvaqseiz liux cix vit(vut);
Geu de caiq mbouj sik,
Hix vit haeuj henz bae.

Seiz gaxgonq caen hoj,
Donqnoh hix mbouj miz;
Yaek gwn donq byaek ndi(nde),
Caj bi bae daengz haemh.

Banneix ndwenngoenz moq,
Miz noh caiq miz bya;
Miz laeuj caiq miz caz,
Naemj gwn maz cungj ndaej.

Gaxgonq youq ranzhaz,
Gvaq laj hix dwglau,

Ngoenz fwn moenqfaufau,
Ndaw ranz lumj dauj raemx.

Seiz guekgya fouqmiz,
Gizgiz hwnj ranzlaeuz;
Raemx mbouj dumz mbouj laeuh,
Raeuz youq onj cwxcaih.

Ngoenzgonq daengz seizhah,
Aeu gyapgya vad rumz;
Yied vad hanh yied dumz,
Ndang cumx swz raemx rwed.

Banneix yungh funghsan,
Youh an miz gunghdiuz;
Seizhwngq mbouj gaenjyiuq,
Raeuz ciuq gwn ciuq guh.

Seizneix cwngcwz ndi(nde),
Gizgiz cungj bienq moq;
Mbanjmbanj doeng goengloh,
Hohhoh cungj fatcaiz.

Seizneix gwndaenj ndei,
Ranzranz meiz(miz) siujceh;

Daengx bouxiq bouxgeq,
Naengh siujceh baeyouz.



▲ Ginhcouh Lungzmwnz Daihgiuz hamj gvaq gwnz haij hawj vunz roxnyinh saengdoengh. Hoz Vazvwnz ingj

Lauxdoengz

□Moz Lijginz / 磨礼勤

Vunzcongnienz doiq song dah lwgnyez miz di yinxdaeuz, nienzgeij hauhneix iq couh rox gangj gij vah gig miz dauhleix haenx, cwnghmingz songde yawj gvaq haujlai saw, gyadingz hix mbouj loek.

“Siujbaengzyoux, gvaqdaeuj gwn cenj caz ndeu.” Vunzcongnienz simhoengz heuh songde.

Song dah lwgnyez doq gvaqdaeuj, Vangz Meijyen ndwn dwk yawj vunzcongnienz goen raemx cawj caz. Vangz Meijyen cam: “Dou deq mbouj gib lo, siengj gwn raemx ndaw

doengj ndaej mbouj?”

Vunzcongnienz gipmuengz aeu cenj suliu ndingq raemx hawj gyoengqde naeuz: “Raemx gyoet bw.” Vangz Meijyen naeuz: “Mbouj youqgaenj.”

Vunzcongnienz song fwngz ndenq hawj Vangz Meijyen, youh song fwngz dawz cenj ndenq hawj Liuz Fanghfangh, Vangz Meijyen naeuz: “Dou gag dem raemx gwn.” Song dah lwgnyez lienzdaemh gwn roek cenj, vunzcongnienz yawj song dah lwgnyez hozhawq gvaqbouh lo, cam: “Haxbaenh sou mbouj daeuj gwn

raemx?” Vangz Meijyen naeuz: “Siengj gwn ha, mbouj gamj cam.” Vangz Meijyen heuh daxmeh de daeuj gwn raemx, vunzcongnienz yawj gvaqbae, Vangz Meijyen naeuz: “Dwg daxmeh gou.” Vunzcongnienz doq heuh gvaqdaeuj naengh daengq naeuz: “Doiq mbouj hwnj, doiq mbouj hwnj.” Song fwngz ndenq cenj caz ndeu gvaqbae. Seiznit caz gyoet vaiq, vunzcongnienz hixnaengz oet caz haeuj cazcung bae, song fwngz cuengq youq gwnzdaiz baihnaj daxmeh Vangz Meijyen. Daxmeh Vangz Meijyen miz di launyaenq.

Vunzcongnienz dwk denva cam baenzlawz baenzlai nanz mbouj dawz daeh hwnjdaeuj, Vangz Meijyen cam: “Boux vunzbiz neix dwg mehyah mwngz?”

Vunzcongnienz naeuz: “Dwg ha.” Vangz Meijyen riu naeuz: “Mwngz baenzneix byom, mehyah mwngz yienghhaenx biz?”

Daxmeh dop de naeuz: “Lwg fangzbyaiz neix mwngz, gangj vah mbouj roxsoq.” Cienj naj doiq vunzcongnienz boizlaex, “lauxbanj, doiq mbouj gvaq, dou saetlaex lo.”

Vunzcongnienz riugoekgoek naeuz: “Mbouj youqgaenj.” Youh dwk denva cam naeuz: “Dahli youq lawz, dawz ngeihcib aen daeh hwnj hajlaeuz daeuj cang saw, heuh Dahyen hwnjdaeuj dem!”

(27)